




ԸՆԴՈՒՆԵԼՈՒԹՅՈՒՆՆԵՐ ՄԱՅՐ ԱԹՈՌՈՒՄ

ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ ԿԱԹՈՒԿ ՈՒԽՏԱՎՈՐՆԵՐԻՆ ԵՎ ԿԱՐԴԻՆԱԼ ՍԻԼՎԵՍՏՐԻՆԻ ԱԶԱԿԻՑ ՀԱՄԱՅՆՔԻ ԱՆԴԱՄՆԵՐԻՆ

Սեպտեմբերի 3-ին Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց Հայաստան ուխտի եկած կաթոլիկ եկեղեցականներին՝ զխավորությամբ Պաղովայի ճեմարանի տեսուչ մոնսենյոր Սանդրո Պանիցոլոյի և առաջնորդությամբ Անդրկովկասում պապական նվիրակ Կլաուդիո արքեպս. Գուջերոտտիի:

Ողջունելով ուխտավորների այցը Մայր Աթոռ Սուրբ Էջմիածին՝ Ամենայն Հայոց Կաթողիկոսը գոհունակությամբ նշեց երկու Եկեղեցիների միջև առկա ջերմ բարեկամական հարաբերությունների մասին, որոնք առավել ամրապնդվեցին երջանկահիշատակ Վազգեն Ա և Գարեգին Ա Հայրապետների օրոք: *«Այսպիսի այցերը, որ կազմակերպվում են դեպի Հայաստան, լավագույն վկայությունն են եղբայրական սիրո վրա խարսխված այդ հարաբերությունների զարգացման և մերձեցման»*, - ասաց Հայոց Հայրապետը: Նորին Սրբությունը նաև տեղեկացրեց, որ Հայ Եկեղեցու բազում երիտասարդ եկեղեցականներ իրենց բարձրագույն կրթությունն են շարունակում Կաթոլիկ Եկեղեցու ուսումնական հաստատություններում:

«Մեզ համար մեծ պատիվ է լինել Հայաստանում և Մայր Աթոռ Սուրբ Էջմիածնում, որպեսզի ճանաչենք արմատներն այն ազգի, այն պետության, որն առաջինն աշխարհում ընդունեց քրիստոնեությունը: ...Գրքերով ծանոթացել ենք հայ ժողովրդի պատմությանը և այժմ ականատեսն ենք ներկայիս պատմության արձանագրմանը», - իր խոսքում նշեց Պաղովայի ճեմարանի տեսուչ մոնսենյոր Սանդրո Պանիցոլոն՝ շնորհակալություն հայտնելով ընդունելության հաամար:

Հանդիպման ընթացքում Վեհափառ Հայրապետը պատասխանեց միջեկեղեցական, ինչպես նաև Եկեղեցի-պետություն հարաբերություններին վերաբերող հարցերի:

Հանդիպումից հետո ուխտավորները Մայր Տաճարում մասնակցեցին Սուրբ Պատարագի արարողությանը:

Հավարտ Սուրբ Պատարագի, Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց հոգևոր առաքելության մեջ կարդինալ Աքիլե Սիլվեստրինիին աջակից եկեղեցասեր համայնքի անդամներին՝ գլխավորությամբ Անդրկովկասում պապական նվիրակ Կլաուդիո արքեպս. Գուջերոտտիի և տիար Պիետսիլվերիո Պոցցիի: Կազմակերպությունն իր հիմնադրման 60-ամյակի առիթով ուխտագնացություններ է կազմակերպել Պաղեստին, ապա Հայաստան՝ որպես քրիստոնեությունը պետական կրոն հռչակած առաջին քրիստոնյա երկիր:

Վեհարանի հարկի ներքո ողջունելով Կաթոլիկ Եկեղեցու ուխտավորներին՝ Ամենայն Հայոց Կաթողիկոսն անդրադարձավ Հայաստանյայց Առաքելական և Հռոմեակաթոլիկ Եկեղեցիների արդյունավետ համագործակցությանը՝ կարևորելով նաև նման փոխայցելությունների կազմակերպումը:

Նորին Սրբությանը շնորհակալական խոսքով դիմեց Կլաուդիո արքեպս. Գուջերոտտին՝ վերհիշելով Ամենայն Հայոց Հայրապետի հրավերով 2001 թ. Հովհաննես Պողոս Բ Պապի Հայաստան կատարած եղբայրական այցի օրերը և ուխտավորներին ներկայացնելով այն սերտ կապերը, որ առկա են երկու Եկեղեցիների միջև:

Ապա համայնքի անդամների անունից խոսք ասաց տիար Պիետսիլվերիո Պոցցին՝ երախտագիտություն հայտնելով ընդունելության համար և ներկայացնելով կազմակերպության գործունեությունը, ապագայի ծրագրերը: Մասնավոր անդրադարձ կատարվեց իրականացվող աշխատանքներում երիտասարդների ներգրավվածությանը:

*ՄԱՅՐ ԱԹՐԱՆ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*